



Principáu
d'Asturies



Nota de prensa

Martes, 7 de xunetu del 2026

Cultura ameyora les instalaciones del Centru de Tecnificación Deportiva de Tresona con una inversión de 160.000 euros

- La consejera, Vanessa Gutiérrez, visitó güei l'actuación que se desenvuelve nel complexu de referencia pal remu y el piragüismu n'Asturies
- Los trabayos incluyen la creación d'una zona adaptada nes grades pa persones con discapacidá

La consejera de Cultura, Política Llingüística y Deporte, Vanessa Gutiérrez, visitó esta mañana les obres d'ameyoramientu que'l so departamentu executa nel Centru de Tecnificación Deportiva de Tresona, en Corvera, con un presupuestu de 159.267 euros.

Los trabayos formen parte de les actuaciones de conservación y modernización previstes pol Principáu p'ameyorar l'accesibilidá y la funcionalidá del complexu de referencia pal remu y el piragüismu n'Asturies. L'equipamientu acueye davezu concentraciones y competiciones nacionales y internacionales y va ser la sede del Campeonatu d'Europa de Sprint Olímpicu del 2028.

En materia d'accesibilidá, ta previsto habilitar una zona nueva nel entornu de les grades adaptada pa persones con movilidad reducida, pa les que tamién se van crear cuatro places d'aparcamientu.

Al empar, va renovase la señalización horizontal del conxuntu del aparcamientu y de los sos viales y va aprovecharse p'actuar sobre los graderíos, onde se va realizar una llimpieza xeneral y se van recuperar los tablonos de madera que conformen los asientos. Estos elementos, esteriores pola esposición a la humedanza y la vexetación, van recibir un tratamientu protector específicu pa esteriores que va medrar la so durabilidá.

Tamién se va actuar nel embarcaderu, onde se va sustituyir l'entarmáu actual de madera de pinu de la pasarela y los pantalanes afectaos poles condiciones meteorolóxiques por una superficie nueva de mayor resistencia. Amás, va quitase la barandiella d'accesu al embarcaderu central pa instalar una estructura nueva de tubos güecos d'aceru lllamiao en frío con protección antioxidante.

Nota de prensa

Les obres inclúen l'ameyoramientu del camín d'accesu al embarcaderu previstu pa la entrega de premios, al que se va aplicar un pavimentu antiesnidiante pa reforciar les sos condiciones de seguranza y usu.

El proyectu incorpora, amás, la instalación de cuatro contenedores prefabricaos sobre cimentación de formigón armao que van ampliar la capacidá d'almacenamientu de material deportivu y van contribuyir a una meyor organización de los espacios auxiliares del centru.

Con esta intervención, el Gobiernu d'Asturies sigue avanzando na conservación y modernización del Centru de Tecnificación Deportiva de Tresona, un equipamientu estratéxicu pa la preparación de deportistes, el desenvolvimientu d'actividaes de tecnificación y la celebración d'eventos deportivos de máximu nivel.